



Tassilo Vtilonis & Hiltrudę ducum Boiorum filius natus est, anno septingentesimo quadragesimo primo. Cum annum duodecimum ageret, ab Vtilone patre in aulam Pipini regis Francorum auunculi sui, eo tempore potentissimi, mittit, ut uarijs uirtutibus instructus patrię rectius præesse posset. Vbi etiam annos duodecim uersatus est.

Eo tempore ipse omnis generis militaria exercitia didicit, atque alios æquales suos longè superauit. In primis uerò legibus Francorum operam dedit, atque ciuiliorem uitam in Bauariam referre proposuit. Itaque amici eius maximam de eo fortitudinis & prudentiæ spem conceperunt. Ceteri uerò iam tum adolecentem suspectum habere, atque uereri ne aliquando per eum & similes Germanorum principum filios Francorum gloria adeoq; Romanum Imperium à Francis in interiorem Germaniam reuocaretur. Itaque quidam ex ipsis Tassiloni clam insidias tendere, atque Pipino regi eum inuisum reddere statuerunt. Hos uerò Tassilo partim beneficijs, partim blandimentis sibi reconciliare, atque in primis Pipinum auunculum suum amicum conseruare decreuit, sperans sese hac ratione plurimum eius opera promoueri posse.